



Broj: 01-02-393/24  
Sarajevo, 17.12.2024. godine

**DOM NARODA PARLAMENTA FEDERACIJE BIH**

n/r gospodina Tomislava Martinovića, predsjedavajućeg  
n/r gospodina Slađana Ilića, potpredsjedavajućeg  
n/r gospodina Nezima Alagića, potpredsjedavajućeg

**PREDMET: PRIJEDLOG ZAKONA O PLINOVODU "JUŽNA INTERKONEKCIJA  
BOSNA I HERCEGOVINA I REPUBLIKA HRVATSKA", predlagač  
Klub zastupnika Stranke demokratske akcije - hitni postupak**

U skladu sa članom 198. Poslovnika Predstavničkog doma Parlamenta FBiH, obavještavam Vas da je Predstavnički dom Parlamenta FBiH na 15. redovnoj sjednici, održanoj 12.12.2024. godine, usvojio Prijedlog Zakona o plinovodu „Južna interkonekcija Bosna i Hercegovina i Republika Hrvatska“ sa slijedećih sedam amandmana koje je predlagač prihvatio, pa su postali sastavni dio Prijedloga ovog Zakona:

**Amandman I**

U Prijedlogu Zakona o gasovodu „Južna interkonekcija Bosna i Hercegovina i Republika Hrvatska“, u članu 1., nakon riječi: „Novi Travnik/Travnik“ brišu se riječi: „s odvojkom za Mostar“, te se dodaju sljedeći riječi: „i pravcu Posušje – Široki Brijeg – Mostar, sa odvojcima prema Livnu, Gornjem Vakufu – Uskoplju i Jajcu“, tako da član 1. sada glasi:

„Član 1.

(Predmet zakona)

Ovim zakonom se uređuju pitanja od značaja za realizaciju projekta izgradnje gasovoda „Južna interkonekcija Bosna i Hercegovina i Republika Hrvatska“ na pravcu Zagvozd (Republika Hrvatska) – Posušje (Bosna i Hercegovina) – Tomislavgrad – Šuica – Kupres – Bugojno – Novi Travnik/Travnik i pravcu Posušje – Široki Brijeg – Mostar, sa odvojcima prema Livnu, Gornjem Vakufu – Uskoplju i Jajcu (u daljnjem tekstu: Južna interkonekcija BiH i Republika Hrvatska) na teritoriji Federacije Bosne i Hercegovine uključujući infrastrukturu projekta, tačku interkonekcije, investitora, način finansiranja, javni interes i provedbu eksproprijacije nekretnina, korištenje zemljišta, upravne postupke izdavanja dozvola i uključenost vlada kantona, nadležnih ministarstava i

drugih organa uprave, institucija i privrednih društava i druga pitanja od značaja za realizaciju projekta."

### **Amandman II**

U članu 5. stav (2), nakon riječi: „realizirati kroz“, brišu se riječi: „dvije faze“. U istom članu i stavu, u tački a) nakon riječi: „Novi Travnik/Travnik“ brišu se riječi: „u prvoj fazi“, te se dodaju riječi: „i pravcu Posušje – Široki Brijeg – Mostar“, dok se u tački a) nakon riječi: „izgradnju odvojka za“, briše riječ: „Mostar“, te se iza riječi: „Jajce“ brišu sljedeći riječi: „u drugoj fazi koja će započeti istovremeno sa radovima na prvoj fazi odnosno najkasnije odmah nakon okončanja prve faze“. U stavu (3) istog člana, iza riječi: „od strane Investitora“, dodaju se zarez i sljedeće riječi: „a u skladu sa tehničkim zahtjevima i pozitivnom analizom isplativosti za dionice gasovoda“. Stav (4) se briše i mijenja, tako da stavovi (2), (3) i (4) člana 5. sada glase:

„(2) Investitor će projekat izgradnje gasovoda Južna interkonekcija BiH i Republika Hrvatska realizirati kroz:

- a) izgradnju interkonekcijskog transportnog gasovoda u Bosni i Hercegovini na pravcu Posušje – Tomislavgrad – Šuica – Kupres – Bugojno – Novi Travnik/Travnik i pravcu Posušje – Široki Brijeg – Mostar;
- b) izgradnju odvojka za Livno, Gornji Vakuf – Uskoplje i Jajce.

(3) Projekat Južna interkonekcija BiH i Republika Hrvatska će se realizirati u potpunosti od strane Investitora, a u skladu sa tehničkim zahtjevima i pozitivnom analizom isplativosti za dionice gasovoda.

(4) Investitor je dužan da nakon puštanja u pogon gasovoda Južna interkonekcija BiH i Republika Hrvatska obezbijedi njegov siguran rad i sve tehničke uslove za prihvatanje u transportni sistem gasa koji se uvozi iz različitih izvora sa pomenutog pravca i njegovu isporuku potrošačima koji su priključeni na transportni sistem, sa ciljem očuvanja postojećeg i razvoja novog tržišta prirodnog gasa."

### **Amandman III**

U članu 7. briše se stav (5) i mijenja se i glasi:

„(5) Izuzetno od odredbi Zakona o eksproprijaciji ("Službene novine Federacije BiH", br. 70/07, 36/10, 25/12, 8/15 – Presuda Ustavnog suda Federacije Bosne i Hercegovine broj U-64/14 i 34/16), Investitor radi potrebe za izgradnju, rad i održavanje projekta Južna interkonekcija BiH i Republika Hrvatska ili osposobljavanje za reverzibilan rad postojećeg transportnog sistema koji je u vlasništvu Investitora ne plaća naknadu za eksproprijisanu nekretninu Federaciji Bosne i Hercegovine, kantonima, gradovima, općinama, javnim preduzećima ili javnim ustanovama."

### **Amandman IV**

Dosadašnji član 8. i POGLAVLJE IV – PROMJENA NAMJENE ZEMLJIŠTA se brišu i vrši se adekvatna renumeracija ostalih članova i poglavlja shodno ovoj izmjeni.

## **Amandman V**

U novom članu 9. u stavu (2), nakon riječi: „(„Službene novine Federacije BiH“, broj 15/21)“ brišu se riječi: „i ostaje na snazi 10 godina od dana njenog izdavanja“, dodaje se novi stav (3) zbog čega dosadašnji stav (3) postaje stav (4), pri čemu u novom stavu (4) iza riječi: „iz stava“, riječ „(2)“, mijenja se riječima „(3)“, te se dodaje novi stav (5) tako da stavovi (2), (3), (4) i (5) sada glase:

„(2) Okolinska dozvola izdata do dana stupanja na snagu ovog zakona smatra se rješenjem o odobravanju studije o procjeni uticaja na okoliš u smislu odredbi Zakona o zaštiti okoliša („Službene novine Federacije BiH“, broj 15/21).

(3) Okolinska dozvola iz stava (2) ovog člana, izuzetno od odredbi člana 82. stav (5) Zakona o zaštiti okoliša, važi do izdavanja odobrenja za građenje u skladu sa članom 12. ovog Zakona.

(4) Nakon isteka roka iz stava (3) ovog člana, zaštita okoliša osigurava se na osnovu važećeg Zakona o zaštiti okoliša i njemu pripadajućih podzakonskih propisa.

(5) Uslovi zaštite okoliša za izgradnju dijelova gasovoda Južna interkonekcija Bosna i Hercegovina i Republika Hrvatska koji nisu sadržajni u okolinskoj dozvoli iz stava (2) ovog člana propisuju se u skladu sa odredbama važećeg zakona o zaštiti okoliša.

## **Amandman VI**

U novom članu 11. stavu (1), nakon riječi: „Komisije“ brišu se riječi: „koju imenuje Parlament Federacije Bosne i Hercegovine“, te se dodaju sljedeće riječi. „koja se sastoji“, nakon čega ostaje postojeća riječ: „od“, a poslije nje se dodaje riječ: „jednog“, te se dodaju novi stavovi (2), (3), (4) i (5), tako da član 11. sada glasi:

„(1) Urbanistička saglasnost izdaje se na osnovu stručne ocjene Komisije koja se sastoji od jednog predstavnika Federalnog ministarstva prostornog uređenja i po jednog predstavnika kantonalnih ministarstava nadležnih za poslove prostornog uređenja iz kantona: Zapadno- hercegovački kanton, Hercegovačko-neretvanski kanton, Kanton 10 i Srednjobosanski kanton, u kojima je u Federaciji Bosne i Hercegovine lociran gasovod Južna interkonekcija BiH i Republika Hrvatska.

„(2) Nadležna ministarstva iz stava (1) ovog člana dužna su da Parlamentu Federacije Bosne i Hercegovine i Vladi Federacije Bosne i Hercegovine dostave imena nominovanih predstavnika Komisije iz stava (1) ovog člana u roku od 30 dana od dana stupanja na snagu ovog Zakona.

(3) U slučaju da nadležna ministarstva iz stava (1) ovog člana ne dostave imena nominovanih predstavnika u roku iz stava (2) ovog člana, prijedlog imena nedostajućih kandidata dostavlja Vlada Federacije Bosne i Hercegovine, vodeći računa o tome da se radi o ekspertima iz oblasti prostornog planiranja i građenja.

(4) Parlament Federacije Bosne i Hercegovine potvrđuje sastav Komisije u roku od 30 dana od dana dostavljanja imena nominovanih predstavnika.

(5) U slučaju da Parlament Federacije Bosne i Hercegovine ne potvrdi sastav Komisije u roku iz stava (4) ovog člana, imenovanje Komisije iz stava (1) ovog člana vrši Vlada Federacije Bosne i Hercegovine u roku od 15 dana od isteka roka iz stava (4) ovog člana.“

Postojeći stavovi (2), (3), (4), (5) i (6) postaju stavovi (6), (7), (8), (9) i (10), te se

vrši adekvatna renumeracija unutar pomjerenih stavova.

## Amandman VII

U novom članu 14., nakon riječi: „se obavezuju da“ dodaju se riječi: „u skladu sa svojim nadležnostima“, tako da član 14. sada glasi:

„Član 14.

(Uključenost vlada kantona)

Vlade kantona: Zapadno-hercegovački kanton, Hercegovačko-neretvanski kanton, Kanton 10 i Srednjobosanski kanton, u kojima je u Federaciji Bosne i Hercegovine locirana Južna interkonekcija BiH i Republika Hrvatska i nadležne institucije i organi vlasti u navedenim kantonima se obavezuju da u skladu sa svojim nadležnostima:

- a) provedu potrebne procedure i donesu odgovarajuće odluke koje su potrebne za osiguranje realizacije projekta Južna interkonekcija BiH i Republika Hrvatska na području svoje nadležnosti;
- b) poduzmu sve potrebne aktivnosti da nadležna tijela jedinica lokalne samouprave, čijom teritorijom prolazi planirana trasa projekta Južna interkonekcija BiH i Republika Hrvatska, sve zahtjeve zaprimljene u postupku rješavanja imovinsko-pravnih poslova rješavaju po hitnom postupku;
- c) za potrebe realizacije projekta Južna interkonekcija BiH i Republika Hrvatska sarađuju sa Investitorom i u tom smislu osiguraju neophodnu dokumentaciju i informacije kao i drugu podršku iz svoje nadležnosti.“

Predstavnički dom Parlamenta Federacije BiH je usvojio i slijedeći

## ZAKLJUČAK

1. Predlaže se da Vlada Federacije BiH i BH Gas d.o.o. Sarajevo u roku od 30 dana stupe u proces reorganizacije BH Gasa d.o.o. Sarajevo, s ciljem uspješne implementacije projekta Južna interkonekcija, uvažavajući ustavnu strukturu Federacije BiH i zemljopisnu pokrivenost ovog strateškog projekta. Reforma BH Gasa će podrazumijevati izmjene upravnih i nadzornih struktura, te odrediti sjedišta za eventualne neophodne terenske urede, kroz izmjene Statuta društva i svih pratećih dokumenata.
2. Predlaže se da se uradi dubinska analiza preduzeća BH Gas d.o.o. Sarajevo sa striktnim uvažavanjem primjedbi, nalaza i zaključaka Ureda za reviziju institucija u Federaciji BiH.

**PREDSJEDAVAJUĆI**  
Dragan Mioković

Dostaviti:

- naslovu
- predsjedniku i potpredsjednicima FBiH
- premijeru, zamjenicima premijera
- Vladi FBiH
- Predsjedavajućem Predstavničkog doma
- potpredsjedavajućim Predstavničkog doma
- sekretaru Doma naroda
- službi Doma naroda
- sekretaru Predstavničkog doma
- službi Predstavničkog doma
- službi za izradu izvornika
- a.a.